



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

Tir Yimym

tiryimym@aolima

tir yimym

TAPAK 7

Boxer Amit Panghal Paris Olympics atema qualify süogo

Ukraine peace summit nung mendendaktsütsü China-i meranga inyakdar

VOL. XXI ISSUE NO. 231 (ADOK 231) DIMAPUR TENTONÜ (MONDAY) AAMI (JUNE) 03, 2024 ₹ 5.00

SKM-i Sikkim maneni yimsü asütsü BJP-i Arunachal nung takok tulu angu

New Delhi, June 2, 2024 (Agencies): Sikkim aser Arunachal Pradesh Assembly elections nung nübortemi tang teinyakdak sorkartem tanaben shimteto.

Arunachal nung BJP candidate 10 den tetokteper shinga melii takok angu. Anungji tanü menden 50 atema dang votes azüng aser BJP-i menden ajak agi 46 nung takok nguogo. BJP den yariteper National People's Party (NPP)-i menden 5 nung takok angu.

Prime Minister Narendra Modi-i Arunachal nung BJP-i takok anguba atema tenüngsang agütsüogo.

"Kanga pelar Arunachal Pradesh. Iba tesüngmangsü state nung alirtemi terenlok politics nem takok ngudaktsüogo. Parnoki @BJP4Arunachal nem maneni takok ngudaktsüba atema kanga pelar. Ozü party-i state renloktsü atema tashitaitba inyaktsü" ta PM Modi-i ashi.

"Iba ya küm 10 tashi Centre nungi teyari tulu ngua terenlok bener aruba atema lir. Arunachal Pradesh ya anü adokdak lima lir. Idaki BJP-i takok anguba ajanga Narendra Modi-i kümsük tasemben atema PM inyaktsü sayur" ta Chief Minister Pema Khandu-i ashi.

Sikkim nunga sorkar yimsü tesüdak Sikkim Krantikari

Morcha (SKM)-i takok tulu nguogo. SKM-i assembly menden 32 nungi 31 nung takok angu aser opposition Sikkim Democratic Front-i menden 1 nung dang takok ngutetogo.

"Ni Sikkim nunger aser ozü party züngsemtem dang pelaba metetdaksür. Onoki temulung taroktiba agi nübortem asohi inyakago. Iba jagi onoki takok angu" ta Chief Minister Prem Singh Tamang-i ashi.

Linük nung Chief Minister mapang talangtiba inyaker SDF lennir Pawan Chamling-i assembly menden ana nungi toktepa nung tamakok nguogo.

Arunachal Pradesh nung Congress-i menden 1 nung takok angu, NCP-i menden 3 aser People's Party of Arunachal-i menden 2 nung takok angu. Maneni Independent candidate 3-ia takok nguogo.

SDF-i küm 25 tashi Sikkim sorkar yimsü süa aruba 2019 küm SKM-i atsüngdoka liasü. 2019 assembly election nung SKM-i menden 17 nung takok angu aser Pawan Chamling'er SDF-i menden 15 nung takok ngua liasü.

Maneni, June 4 nü Sikkim nung Lok Sabha menden ka aser Arunachal Pradesh nung ana atema votes azüngtsü.

DNSU ketdangpur tasentem shimogo

Dimapur, June 2, 2024 (TYO): June 1, 2024 nü Hotel Acacia nung Dimapur Naga Students' Union (DNSU) ketdangpurtem tasen shimba sentong ka agiogo.

Naga Students Federation (NSF)-i kümsük 2024-26 atema DNSU ketdangpurtem shimtsü asoshi high power committee (HPC) ka tenteta liasü aser parnok ketdangsüba kübok ketdangpurtemi menden melenzükba sentong agia liasü.

DNSU ketdangpurtem tasentemji Hinoto P Aomi (President), Michael Yanthan (vice president), Michael Kath (general secretary), Rukuwezo Wetsah (assistant general secretary), Khrieketouzo Natso (secretary finance), Tsuktilong Jamir (secretary games and sports), Kevin Gonmei (secretary education), Tesiding Newmai (speaker) aser WS Kahor (deputy speaker) lir.

"DNSU aser district administration tsüngda amalitepa Dimapur tajungba kümdaktsütsü teimla lir" ta Dimapur Deputy Commissioner Dr. Tinojongshi Chang-i ashi.

HPC-NSF ajanga DNSU sasep nung ken o angatettepa atema pelar aser ketdangpur tasentem taintem dang nungi shisatsü agia inyaktsü ayongzüker, ta DC Dr.

Tinojongshi-isa ashi.

NSF President Medovi Rhi-ia taoba ketdangpurtemi Dimapur nung kaketshirtem asoshi mapa balala inyakba atema pelaba metetdaksü.

Paisa DNSU dang nübortemi temelenshi bener arutsü ta temulung alemba ama mapa inyaktsü ayongzüker aser pei pei mapa bendanga agüja aser tebilemstsü khuret bona inyaktsü ajungmeso.

"Tesüba nung DNSU ya Dimapur nung kaketshir telok tongtiba aser tashitait telok ka liasü. Ajisüaka tanü DNSU sasep nung langkaka meshitak aliba ajitet. DNSU sasep nung mepetmesü anentsüla" ta Naga Council Dimapur (NCD) President Etsungmomo Kikon-ia ashi.

"DNSU sasep nung telongjem alitsüla aser kaketshirtem asoshi inyaktsüla. Naga loktiliba nung mapang talangka meputepi dang arur aser asenoki kin, kidong aser tesem dak rangloker inyaksangshir. Iba tashidak ajanga asen Naga loktiliba tejakleni mouteter" ta President tasen shimba Hinoto-i ashi.

Lanurtemi item onük ya tangatettep kati arutsü atema inyaktsüla aser kin balala tsüngda amalitep adokdaksütsüla, ta paisa ayongzüker.

Congress-i Lok Sabha menden takok angutsü; Centre nung sorkar akümtsü Nagaland nung ULB elections nung Congress-i shilem agitsü



Kohima, June 2, 2024 (TYO): Congress-i Nagaland Lok Sabha menden takok angutsü aser Centre nung INDIA teloktep sorkar akümtsü ta AICC in-charge of Nagaland, Girish Chodankar-i ashi.

Hotel Vivor nung osangbener den jembidang Chodankar-i iba osang metetdaksü. Iba senden nung Nagaland Pradesh Congress Committee president S. Supongmeren Jamir aden.

Agency balalai exit poll results sangdongba atema Chodankar-i "parnoki ashiba ya meshitak saka Centre nung INDIA teloktepi sorkar akümba sülen tarba anogo ana tsüngda jangjatsü" ta ashi.

"Onoki Nagaland Lok Sabha menden nung takok anguba dang masü saka linük nung INDIA bloc-i menden teimtiba nung takok angutsü. Tanga party temia iba teloktep pusemstsü" ta pai ashi.

"India-i taila tenangzükbatem, sorkar timi ketdangsüba masüba, mapa manguba khuret, jenjang atuba anema vote agütsüogo. Nübortemi India tarutsü atema vote enoktsüogo aser onoki exit polls tai ta ashitsü" ta Chodankar-isa ashi.

"Kohima nung yashi NPCC sanen luden senden amendang Urban Local Bodies (ULBs) election nung shilem agitsü lemtetogo. Eastern Nagaland dak alia Congress-i municipalities 3 aser town councils 36 nung ward teimtiba nung tokteptsü" ta paisa metetdaksü.

Eastern Nagaland Peoples' Organisation (ENPO)-i election nung shilem agitsü telemtetba agishira Congress-i candidate shima toktepdaktsütsü ta Chodankar-isa ashi.

Paisa lanurtem aser tetsürtem dang Congress party tenüng nung ULBs elections nung shilem

agitsü ayongzüker.

Nübortemi shimtetba nübotem ama nenoki local self governance nung shilem agiang aser tang aliba state sorkar melenzüktsü ta pai ayongzüker.

"Onoki Naga nunger aser onük balala kümsüka ayutsüpur lennirtem adokdaksünür" ta Chodankar-isa ashi.

NPCC president Supongmeren Jamir-ia Congress ticket aginüba candidate temi June 7 tashi tenüng agütsütsü akok ta metetdaksü.

Paisa ENPO dang ULB elections nung shilem agitsü mepishi. "Iba election ya pei pei local areas renloktsü atema lir anungji nenoki tajangzüker angutsü atema shilem agitsüla saka nenoki dang lemtet agitsü" ta Supongmeren-isa ashi.

Rising Peoples' Party (RPP) den tesentaktep aliba atema ashidang "iba teloktep ya Tseminyu district nung dang lir aser RPP-i ward teimba nung tokteptsü" ta Supongmeren-isa ashi.

Osangbener den jembiba mapang NPCC working president Khriedi Theunuo aser vice president Captain G K Zhimomi na aden.

Advisor Kropol-i Jakhama-Viswema apu semdang

Kohima, June 2, 2024 (TYO): Prisons and Printing & Stationery Advisor Kropol Vitsu-i Kohima district nung Jakhama-Viswema NH-2 tsüngda apu yanglushiba semdanga liasü.

Kohima Deputy Commissioner-i May 30 nungi E-service station Jakhama anasa apu nung 12 tonnes tema Heavy

Motor Vehicles (HMV) mesenzütsü tenokdanga agüja lir.

"Iba mapa nung inyakerter aser contractor firm Fortuner site engineers-i kanga meranga inyakba atema pelar. Anogo ana tsüngda apu lapoktsü ta contractor-i ashi aser maneni 12 tonnes tema HMV

mesenzüdaktsütsü" ta Advisor Kropol Vitsu-i ashi.

June 1 nü Advisor-i National Highways & Infrastructure Development Corporation Limited General Manager Gajendra Singh Rana den jemi aser apu den Kohima-Mao lenmang majungba indang lemsatepa liasü.

DLST Jubilee Tower aser tzü ajemdak merüktet



Dimapur, June 02 (TYO) : 2018 küm Dimapur Langpangkong Senso Telungjem (DLST) tenzüker küm tenem ajungba hon jubilee amungba nünyu Dimapur yimti topur jungdaktsütsü aser Dimapur ama tatsük lima nung nübortema anisüngzüker angutsü atema Dimapur Municipal Council den angatetteper Jubilee Clock Tower cum Free Public Drinking

Water Booth ka NL Road nung New Market lenjem nung yangluja liasü. Ibai Clock tower dang masü saka tajemtzü atema filter asüba tzü tajung amangsangwa methitemi anguba tesem ka lir.

Ajisüaka, tezüdangtsü kaji iba tesem nung ya temeket nung alir shishilembartemi pei dokan aser pie kidang janaona oktenba ajak bener arua tokzüka yutsüba agi

temulung anisüngzüka reprangtsü melen tesempatsü tesem ka kümdaktsüba menokdangteti tanüa mapa inyakerter kar nem iba tesem merüktetdaksür, ano naro tsüki dena yanglutsüsa tajungba küma yanglushiogo.

Asenok nisung dak mebilemdang aser mangatet kaji, iba ama nübortem asoshi yanglutsüba tesem tajung nun g kari janaona endoker, kari sali metsü metsür aser kariibo aonung chiyongtsü yoka amenba gari food cart dena anena yutsür.

Iba ama mebilemdangi pei yimti menentsüsa inyakba mapatem melenshitsütsü nükjidong nung, tezümedangi ano maneni tanüa DLST Jubilee Tower cum Free Drinking Water Booth anepalurtemi merüktettsüogo aser tzü filter aser tank ajak shitoka mungogo. Dimapur nung alir sensosanger ajaki ibai pei meyong ama bilema anepaludaktsüner ta iba tesem anepalurtemi metetdaksüogo.

Raj Bhavan nung Telangana State Foundation Day amung



Dimapur, Aami/June 02 (TYO): Raj Bhavan, Kohima nung June 2, 2024 nü Telangana indang state foundation day munga liasü.

Iba sentong nung jembidang Nagaland Angh La Ganesan-i Telangana nüburttem den tepela lemsatep aser küm tanabuba iba tongtipang anogo amungba ajanga Ek Bharat Shrestha Bharat atema inyakba sayur, koba agi asen linük nung kin balala telungjem nung aliba tali jangjar, ta ashi.

"Telangana ya puti otsü nung takar, sobaliba tabu balala aser lenla balala nung terenlokba lir aser linük asoshi shilem tajung agir. Tanü asenoki Telangana nem akum agütsüdang asenoki par ayak balaka agizükba kisüing masü India nunger ama asenok ajak ka kula tebong alangba telungjem aseni agizker," ta Angh La Ganesan-i ashi.

Telangana tenzükba nungi takok balala anguba ajanga tashi tait, temulungtetba tulu

asobaliba tsütsü takar indang otsü ashir. Nagaland nung arua aliba Telangana nüburi tsüingsangba aser ken atenba asenoki jangratema agizüker aser ibaji ajanga state indang sobaliba aser yimsüyimbong tajung sayur, oshi-oben, sobaliba, yimsüyimbong aser sübosolemtsü balala süaka asen linük nung külemi litetba tanüla sayur, ta pai ashi.

Ek Bharat Shrestha Bharat ya asen linük nung kin balala telungjem nung aliba benjongtsü nükjidong nung tenzükba lir. Iba sentong ajanga state kati danga state ka indang sobaliba angateta tangatettep aser temeimtem aokdaksür. Nagaland aser Telangana meta balala nung süaka iba anogomung nung lungjemba sayur, ta Angh-i ashi.

Iba benjongmung ya Telangana state kumtetba atema kisüing masü saka asen linük telungjem asoshi külemi inyaktsü tangatetba akangshiba

lir. Iba ama sentong yagi asenok tali angatetteper, tesendaktep adoker aser külemi tangatettep nung alitsü atema lenmang lapoktsür, ta pai ashi.

Pai Nagaland nung aliba Telangana nüburttem dang pelaba lemsatep aser tarutsü anogotem nunga state ana tsüingta tesendaktep tali akangshia aotsü imlar ta shia liasü.

Iba sentong nung Kohima aser Dimapur nung aliba Telangana nüburttem arua aden, kong Mohan Rao, Hemalatha & group, aser Bhoomika & group ajanga Telugu sobaliba ken aser tsüingsang agi shilem agia liasü.

Commissioner & Secretary to Governor, Rajesh Soundararajan ajanga sentong nung adener pela agizük, Nagaland Telugu Samaj indang tir Shankar Surada ajanga Telangana state indang rateta ashi aser Joint Secretary to Governor, Mhomo Tungoe ajanga melepzüing o jembia liasü.

Mizoram: Aizawl anentsüh nung asür nisung 29 jungogo



Aizawl, Aami/June 02 (Agencies): Assam den arütsüa aliba Kolasib district kübok Tlawng ayong nungi Hokulbarnü tetsür tasüing ka ngutetba sülen Mizoram nung anentsüh agi asür nisung 29 jungogo, ta ketdangsürtemi ashi.

Aizawl district kübok Aibwak yimtsüing nung anentsüh aluba mapang nisung ana asüba nungi arishi küm 34 tain Vanlalruali ya dena liasü, aser la indang tasüing ya Kolasib district kübok Hortoki yimtsüing nung aliba Tlawng ayong nungi Hokulbarnü ngutet, ta ashi.

Mongulbarnü anentsüh aluba sülen Vanlalruali aser la kinungbo ya samar bushia liasü.

Hortoki nung ayong nungi la tasüing agitetba sülen Kawnpui-i bener ogo, ta ketdangsürtemi ashi.

Hokulbarnü Vanlalruali'er kinungertem Kawnpui jila

bushia ao aser parnoki iba tasüing ya la indang lir ta jangjateta liasü.

Samar aliba nisung pongu Honibarnüa mameni bushia liasü. Parnok ya ita trok kinü tanur ka densema Melthum nungi nisung pezü aser Aibawk nungi ka lir.

Mongulbarnep arütsülen Melthum aser Hlimen tesem nung long atoba tesem tejen ka nung anentsüh tulu alua nisung aliba ki aser mapa inyaker indang camp tem anebanga nisung 15 asü aser pezü samar bushia liasü.

Hlimen nung anentsüh agi ki ana anenzüker aoba nung nisung trok asü aser Aizawl kübok Salem tesem nunga anentsüh alua nisung asem asü.

Mongulbarnün Aizawl nungi kilometre 15 shi pilar Falkawn yimtsüing nung anentsüh aluba nunga nisung ana asü aser Aizawl district kübok Kelsih

asur Lungsei yimtsüing nunga ka-ka asü.

Asür 29 nungi parnok 21 local nisungtem lir aser nisung ti ya Jharkhand aser Assam kübok Silchar jila nungi lir, ta state disaster management and rehabilitation department ajanga ashi.

Anentsüh aser tzüinglu aruba ajanga lendong balala ajuruba nung asüba kinungertem nem teyari sen lakh pezü-zü agütsütsü, ta Mizoram Chief Minister Lalduhoma-i sangdongogo.

Cyclone Remal ajanga bener arutsüba tzüinglu ajanga lendong timtem balala ajuruba nung yariteptsü atema sorkari sen crore 15 lemsükja lir, ta pai ashi.

Hokulbarnü Aizawl district administration ajanga Hlimen nung anentsüh aluba tesem temeket nung alirtem ajunga dang ainshitsü totuyuba agüja liasü.

Manas National Park nung jeep safari season atsülangtsür

Pathsala, Aami/June 02 (Agencies): Assam kübok Manas National Park ketdangsür temi jeep safari season June 20 tashi atsülangtsüba sangdongogo, anungji tourist temi maneni iba park indang tebour ajung maneni reprangtsü maongka agütsür.

Meyi aruba ajanga iba park ya June 5 nung shibangtsü sangdong ka agütsür lia iba telemtetba ya agir.

Banhbari range indang ranger Barin Kumar Boro-i osangbener dang ashiba agi, tourist tem maneni arur aser park indang lenmang junga aliba mechi mapang atsülangtsü telemtetba agi.

Safari ya Banhbari range tetenzükdak nungi Mathanguri tashi aoba lenmang tongtipa nung dang alitsü, ta ashi.

Lenmang nung tourist tem mesenzütettsüsa akumba ajanga meyi mapang iba park ya shibanga atar.

Ajisüaka tensa tajungba akumba aser tourist temi maneni semdangba ajanga ketdangsürtemi iba park shibangtsü anogo atsülangtsüsa akum.

Mapang atsülangtsüba ajanga arem shiruru aser alima meimer temi iba park nung takum shiruru aser süngdonglidong repranga jajatsü maongka agütsür.

Sepaitem ali tashi arütsü asoshi tebilemtsü mali: CM Pema Khandu



CM Pema Khandu

Itanagar, Aami/June 02 (Agencies): China den arütsülen tebilemtsü kecha mali, ta Arunachal Pradesh Chief Minister Pema Khandu-i ashi aser arütsülen aliba armed forces tem tenüing sanga liasü.

Osangbener den jembidang, ali nung bendanga agütsüba sepaitemi region wkazüka arur, anungji shisabolutsü kecha mali, ta Arunachal Pradesh CM-i ashi.

Ajisüaka tarutsü anogotem rara adokra Ministry of External Affairs-i achayangtsü, ta pai ashi.

Taoba sorkar mapang arütsü tebilemtsü senzüka yutsü, saka PM Modi-i aniba sorkari Army aser Central Armed Police Forces atema infrastructure ajanga sepaitem tali ajungmesor, ta CM

Khandu-i ashi. Arunachal Pradesh ya linük asem, Bhutan, Tibet-China aser Myanmar den arütsüa lir aser item rongnung Tibet-China den arütsü ya talangtiba lir, ta Khandu-i ashi.

State nungi saisaponger temi otsü tasen yangluba atema jembidang, state nung ki o jen aser sports facilities tajung aliba ajanga takok angur, ta CM Pema Khandu-i ashi.

National aser international level nung asaya balala aser asayartem ajangzüktsü atema sorkari sentong balala tenzüka lir ta pai ashi.

"Taoba mapang state nung saisapong atema ki o jen tajung meliasü, saka tesüiba küm 5-7 tsüingta sorkar ilenji temulung agüja inyak," ta pai ashi.

Assam nung aket mozü jenti apu

Guwahati, Aami/June 02 (Agencies): Deobarnü Assam-Tripura arütsü kübok Churaibari anasa nokdanga aliba cough syrup (aket mozü) aika apu.

Police temi ashiba agi, mozü ya Karimganj, Assam kübok Churaibari nung aliba checkpost ka nung apu.

Iba dak sendakba nung Uttar Pradesh nung alir Sonu ta sür nisung ka pua lir.

Police temi meita aoba ama registration number

HR37E7205 aliba truck ka anendaktsü. Iba sülen parnok truck ya kaka bushiba mapang truck bed nung miima aliba compartment ka nungi carton 22 sünga nokdanga aliba aket mozü inoka aliba ngutet.

Aket mozü ya bottle 3300 liasü ta police-i ashir.

Iba gari ya Tripura yimtiba, Agartala leni aorba liasü ta ashir. Iba dak sendakba nung police temi bushisüingdang tenzükogo.

PM Modi leniba nung senden mena tongtibang onük aika jembli



June 02, 2024 nü New Delhi nung Ato kilonser, Narendra Modi-i tongti ketdangsertem den senden amendang tangokba noksa nung angur.

New Delhi, Aami/June 02 (Agencies): Amongnü Ato kilonser Narendra Modi leniba nung tongti ketdangsertem senden aika mena linük tesem balala nung kanga tsüka akümba aser tawa cyclone Remal agi state aika kongshiba tensa asadangogo.

Senden nungji Cabinet Secretary, NDRF nung tongti aser Principal Secretary to PM densema densema tongti ketdangsertem aika densema liasü.

Osang angazükba agi, Modi-isa June 4 nü Lok Sabha election agiba osang sangdongba sülen sorkar tasenba tenteta mezüngbuba anogo 100 tsüngda inyaksü onüktem atema jembli.

Honibarnü Exit polls ajanga

BJP-i aniba National Democratic Alliance (NDA) teloktepi takok tulu ngua Modi-i tang agi tasembenbuba Ato kilonser tenangzükba agitsü ta asadangtetogo.

Ato kilonser leniba nung amenba senden nungsa June 5 nü World Environment Day amongtsü aliba atema terenemshiba jenjang asadangogo.

Lok Sabha election matongdangyongi Ato kilonser Narendra Modi-i sorkar ministries aser department balala dang Centre nung sorkar tasenba akümba sülen mezüngbuba anogo 100 nung teinyaksü mapatem atema sentong renemang, ta tuyua liasü.

Amongnü Modi'er kidang senden aika ayongzüka

amenba mapang nung pai ketdangsertem dang hospitals aser public kiojentem nung fire & electrical safety audits agitsü tuyuogo.

Kasa senden nungji ketdangsertemi tawa Cyclone Remal ajanga Mizoram, Assam, Manipur, Meghalaya aser Tripura state tem kongshiba osang metetdaksü.

Tesülen Modi-i X ajanga, "Linük tesem balala nung kanga tatsük akümba aser cyclone yipru sülen tesem balala nung tzümetsüng atalokba tensa asadangtsü atema senden ayongzüka menogo. Item timtem ajanga kongshirtem nem teyari agütsütsü atema inyakba maparen asadangogo," ta metetdaksü.

Opposition-i EC dang vote azüngdang telatetba shidak beshitsü mepishi

New Delhi, June 02 (Agencies): Amongnü opposition INIDA teloktep nungi lenirtem telok kati Election Commission (EC) ajurua June 4 nü vote zünga election agiba osang sangdongba mapang inyakyim aser telatetbatem shidak beshidaktsüner, ta mepishio.

Election Commission ajuruba sülen osangbenertem den jembidang Congress lenir, Abhishek Manu Singhvi-i, "Election dak sendakba inyakyim piyong nung tang agi party balala nungi telok asebumbai Election Commission ajurur. Onoki onük balala bener yagi aru saka tongtibangtibaji postal ballot azüngba aser iba osang tama sangdongba lir," ta metetdaksü.

"Election Commission indang temzüng nung yamai tejangja shia lir- postal ballots ji tama azüngtsüla aser iba osangji EVM osang jakdang sangdongtsüla. Election Commission-i iba inyakyim agienadokogo, aser ibaji temzüng alema inyakba lir. Anungji Rule 54 (a) nung alibaji yanglushitsü makok mesüra

agentsü makok; ibaji shidak beshitsüla," ta pai metetdaksü. INDIA teloktep nungi lenirtem jagisa Election Commission of India dang telatetba ajak shidak beshitsü mepishia metetdaksü.

Communist Party of India (Marxist) general secretary, Sitaram Yechury-i, onoki election commission dang telatetba ajak beshitsü metetdaksüogo, aser telatetbatem rongnung item ya densema lir- EVMs indang control units belenshibaji CCTV aliba corridors ajanga dang belenshitsü aser control units nungji anogo aser mapang tejangja sayatsüla, ta metetdaksü.

"EVMs seal asüba mapang nung inokba slips aser tags ji vote azünger agents ajak dang sayatsüla," ta Yechury-isa metetdaksü.

Opposition party temisa party nung inyakertem dang June 4 nü vote azüngba inyakyim ajak kanga junga mita reprangtsü aser polling station shia nung vote kwi agütsüar shia aliba form 17C ji metetsüla, ta metetdaksüogo.

Joko Hyderabad ya Andhra Pradesh state yimtiba masü

Hyderabad, June 02 (Agencies): Andhra Pradesh Reorganisation Act, 2014 kübok Amongnü (June 2, 2024) nungi joko Hyderabad yimti ya Telangana aser Andhra Pradesh state naprongla atema külem state yimtiba ka masü.

June 2 nungi Hyderabad ya Telangana indang state yimtiba dang asütsü.

2014 küm Andhra Pradesh nungi Telangana state alangtetba mapang nung Hyderabad ya küm 10 asoshi dang state anaprongla atema yimtiba aküm.

Telangana state ya 2014 küm June 2 nü tenteta liasü.

"Shima aliba anogo (June 2) nungi tenzüka tang Andhra Pradesh state yimtiba,

Hyderabad ya küm ter atema dang Telangana aser Andhra Pradesh naprongla atema state yimtiba asütsü," ta Andhra Pradesh Reorganisation Act nung shia lir.

"Sub-section (1) nung shia aliba ama iba mapangji (küm 10) tembangba sülenbo Hyderabad ya Telangana state atema dang yimtiba asütsü aser Andhra Pradesh state atema yimtiba tasen ka alitsü," ta kasa Act nungjisa zülua lir.

Mapang talangka nungi Telangana state tentetsü atema takhangba agüja aruba sülen 2014 küm February nung Parliament nung AP Reorganisation bill agizüka liasü aser 2014 küm June 2 anogo nung iba takhangbaji ataloktsü.

Taoba ita Telangana Chief Minister, Revanth Reddy-i ketdangsertem dang June 2 sülenbo Hyderabad nung Lake View government guest house ama kiojentem agiadokang ta tuyua liasü. Küm ter atema Andhra Pradesh nem item kiojen agüja liasü.

Küm ter süia aruogo saka tang tashi Andhra Pradesh aser Telangana na tsüngda kiojentem melemdanteter.

Telangana state sorkari cabinet senden nung state lemdangba dak sendakba onüktem nung o lemteptsü ayong, ajisüaka Lok Sabha election indang model code of conduct (MCC) benoka aliba agi Election Commission-i temelaba magütsü liasü.



June 02, 2024 nü East Delhi kübok Geeta Colony nung Delhi Jal Board indang tanker ka nungi tzü tajemtsü alem dang tangokba noksa nung angur.

Delhi CM Kejriwal Tihar Jail-i tanaben iogo

New Delhi, June 02 (Agencies): Lok Sabha election atema nüboyimtsü asoshi Supreme Court-i Delhi Chief Minister aser AAP tongti lenir, Arvind Kejriwal nem interim bail agüja liasü, ajisüaka iba mapang tembangba sülen Amongnü pa tanaben Tihar Jail ketdangsertem matsüngdangi ao.

Amongnü AAP office nung osangbenertem senden ka ayongzüka jembidang Kejriwal-i, "Iba linük matsüngdang Ato kilonser Modi-i pa ket nung ni anema kuli kecha mali ta agizükogo," ta metetdaksü.

"Ni Delhi nung nüburtem dang ni ano jail-i air, aser ibaji ni ochimashi iyakba agi masü saka kijai yimsüsüba anema adokba agilir ta ashir. Iba linük matsüngdang Ato kilonser Modi-i pa ket nung ni anema kuli kecha mali ta agizükogo," ta pai metetdaksü.

Amongnü pa bail tembangba anogo nung pai Rajghat semdang aser Mahatma Gandhi nem akhüm agütsü.

Anepdang Arvind Kejriwal-i X ajanga, "Supreme Court tetuyuba nung election nüboyim nung shilem agitsü atema ni anogo 21 asoshi bail angu. Ni Supreme Court dang kanga pelar. Tanü ni Tihar jail matsüngdangi aotsü. Ni nikongdang 3:00 ako nung kidang nungi apusotsü. Mezüng ni Rajghat semdangtsü aser Mahatma Gandhi nem akhüm agütsütsü. Iba nungjagi ni Connaught Place nung aliba Hanuman tekülem kidangi oa Hanuman temoatsü meshitsü. Iba nungjagi ni party office-i oa party nung inyakertem aser lenirtem ajurutsü. Iba nungjagi ni Tihar-i aotsü. Jail nungi ni nenok ajak anepalutsü. Nenok pelaa lira ni-a jail nung pelaa alitsü," ta metetdakja liasü.



New Delhi, June 02, 2024: Delhi Chief Minister Arvind Kejriwal Tihar jail-i meyipba aotsü lia pai AAP office nung osangbenertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, JUNE (AAMI) 03, 2024

Jungjunga renemtsü nungdaker

Nagaland police purtem election dak aketba mapa inyaksü atema Bihar-i yokba rongnung nisung asem tashi anü tatsük metizüktet asüba osangji tejashitsüka aser tesasatsüka lir. Asenok Nagaland nung alirtem asoshi tatsüktiba tesemji Dimapur lir. Ajsüaka, Bihar atsükba ama tatsükji Dimapur atsükba den medemdangtsü makok. Asen lima nung atsükba yabo, kanga tatsük asüyonga temperature asadanga nung 30 degree Celsius dak tera agi dang tali asütsü, ajsüaka Bihar nung taoba ita atsükba anü tatsük asadanga nungbo 48 degree Celsius dak tali atuba anogo aser tesema liasü. Ajibo, asenok ama temekong lima alirtemibo aikati metizüktettsü. Talisa asenok ya tangar dang nungi temekongba lima nung alirtem dang masü saka asenok aika anü tatsük manung mapa temerang inyakba nisungtem masü, anungji asenoki aiben tatsüka aser temekonga metizüktetter. Ano, sepaitem balaka, anü tatsük nung asüyonga parnok sepa süoshi dang semer senzüsüla aser sepa süoshiji talem asünungji tatsük mapangbo, atangji, aikati talem süoshi semer mapa meinyaktettsü. Ibajibo mapa inyaker masü saka temerenshi achir amai dang akümer. Item tatsük talem mapang ajak kokteta mapa inyaksü aser tongpang nung nokdaksü asoshi sepaitem dang masü saka nübor ajak jungjunga renemtsü nungdaker. Asenok ya balaka mapa ajak nung kanga zübazübar, kechi mapa nung südir süaka mapa shitak inyaksüba masü saka sen kwi angutsü ta asüba nung dang rangloker. Iba jagi asen inyaksüba mapa asoshi renemtsübo aiben temulung magütsür. Aji oda, computer amshia mapa inyaksüba mapa nung shimer saka computer amshitsübo tejangraa mejangrar aser tesayua mesayur. Kasaji, sepa mapa inyaksübo shimer saka sepa mapa inyaksübo junga mesayur aser tangazüka mangazüker. Iba jagi shitakba mapa inyaksüba mapang arudang tamakok aser takoksa dang masü saka lendonga ajurutsü. Aji oda, nübortem asoshi inyakba mapa nung peisasa rajema renemshitsüba mapatem aika lir saka ano ketdangsertemia mapang aser mapa inyaksüba tesem apir, mapang mapang shia mapa inyaktertem süli mesüra sepaitem süli tangatetba tasen nung renemtsüsüba kanga nungdaker. Aji oda, tang amaji metetsümonga asen lima dang nungi kanga agia tatsükba limai sepaitem election mapai yokdang, oagiji anü tatsük maremtettsüsa apudang kechi koma asütsüla ta asüba tangatetba aser teinyaksütem metetdakja sepaitemji renemtsü asü merenemtsüar ashitsü makok, ajsüaka yamajika renemtsü asübo nisung takümjia kümzükla ta bilemer. Anü tatsük Celsius degree 48 dak tali kümer 50 degree Celsius tongnüa tua anü apuba tashi jagibo tzüa jaa atutsü. Iba ama anü tatsük apudangjia asenokbo chiyongtsüa shitak machi aser tzüa junga majem ser süoshibo tokolak nungi temepu tashi talem süoshi süpur anü tatsük manungji senzüra, shibaibo anü tatsükji tizüktettsü? Tangjibo tatsük limai yok saka ano ya ser kanga temekong limai yoktsüa akok, idangjia temekong lima nung mapa inyaka jajatsü atema tangatetba agüja mapa inyakyim mesayura karbo sükseta asütsü. Mapa ya tulu tila ta masü saka ajak tongtibang, anungji ajaki pei mapa nung süoki ia inyaksüla aser mapa inyakdang timtem lendong majurui mapa shitak takok ngua inyaksü atema tanishiri pei kübok inyaktertem ajak dang mapa inyakyim aser temang amshiyim sayutsü tim. Kechi mapa nung südir temang shitak anema alitsüba kanga tongtibang, anungji tanishiri anir pei kübok inyaktertem ajak chia ajemba aser taküm yimya ajak nung peisasa pei azüokteta aliba taküm kaka asütsüsa renemtsüba kanga asütsü. Aji oda, sepaitem balaka pei temang touzük aser tar na putepa alitsüba kanga tongtibang lir. Iba jagi tesem balala nung mapa tapu balala inyaka jajadang memeteti aser meteta timtem lendong nungi kümzüktsü.

OLEMSABANG

Ao Naga Mission Otsü 1872-1897

(History of Ao Naga Mission 1872-1897)

- Rev. Dr. S.Wati 30/5/2024

(Yashi adok nungi...)

Mezüng American Missioni Ao Naga Mission Station tenzükba

Kodang Ao Naga mezüng nisung 9 bapti parnok Dr. Clark, American Missionary Ao Naga tenem Molungkimongi anir atutsü sentong yanglu. Süpongmeren ajanga Dr. Clark den iba tebilemba lemsatep aser Dr. Clarki semdangtsü mulunga agizük. Dr. Clarki Sibsagar Deputy Commissioner dang Ao Naga tenemi atutsü temelaba asüngdang saka pai langzü, "Tenemi atutsü shibai bilemer paji tamachi, sorkari kodanga temelaba magütsütsü, kü artsü atena meyoktsü kü tenyaksü" (L.Kijung Ao, *Nokinketter Mongchen*, p. 26). Ano Dr. Clarki Viceroy of India Calcutta tang temelaba asüngdanga yamai langzü, "Pai Naga tenem shirurutem dangi tutisüra pa kisüng khuret asütsü aser sorkar sepa nungi kecha meyimlatsüla" ta langzü (Mary Mead Clark, *A Corner in India*, p.16). Ano American Home Board-a Naga Mission tasen lapoktsü memulung. Aji saka Dr. Clarki kechi ataloktir atalokaka ni aremstü ta mulungtet (Mary Mead Clark, *A Corner in India*, p.26). Anungji Dr. Clarki 4th August 1873 nung American Home Board dangi yamai shiti ka zülü, "Naga nung asoshi mission tasen ka lapoktsü mechi nung Home Board den tesendaktep raksatsüsa kümra ni kecha atidaka mali" ta zülü. Sorkar aser Home Board tenokdanga liaka Ao Naga nungertemi mulungsoa jaokba ama pai Khrista asoshi pa taküm tenla bendanga agütsütsü mulungtet.

Mapag tatong nung Ao Naga Mission tenzüktsü asoshi Molungkimong yimsüsürtemi nokinketer 60 tashi shimteter Dr. Clark kümzükla anir atutsü asoshi Sibsagari yok (Mary Mead Clark, *A Corner in India*, p.13). Tamanger 9 dak alaka tanüngbatemji mamangertem liasü. Sibsagar nungi anogo 3 nü tashi jajar Molungkimong 18th December 1872 atong. Dr. Clarki mamanger temeinerem nem senpak 14 agütsü saka parnok meyiper Mission nem tenla agütsü (*Fifty-ninth Annual Report 1873* in ABMC, p.66). Yim tonger anogo 5 nübuba amongnü 22nd December 1872 tamanger nisung 15 baptitsü, Kibubar Benjong achi aser nekongtsütsü sarasadem tekülem sentep liasü (A. Bendangyapang Ao. *History of Christianity in Nagaland: A Source Material*, p.75). Iba anogoji Ao Naga ali (soil) nung mezüngbuba Ao Naga Mission aser lim baptist arogo tenzükba liasü. Dr. Clark anogo 5 nü tashi Ao Naga tenem Molungkimong nung monger Sibsagari alu aser pai pa kinungtsü aser medemer tang yamai ashi, "Ni amanger ni kü taküm mapa nguogo" (I believe I have found my life work), (Mary Mead Clark, *A Corner in India*, p.15). 1873 tamanger 24 liasü; Sibsagar nung 9 aser Molungkimong tenem nung 15 (*Fifty-Ninth Annual Report 1874* in ABMC, p. 66). Iba mapang Godhula aser kinungtsü küm talangba len Molungkimong nung lia Süpongmeren aser tamangertem anir Ao yimtsüng kar semdanga liasü.

Mrs. Mary Mead Clark Americai sodi or alidang Dr. Clark aser tsümar teyariteper ka, Ao Naga tenem Molungkimong nung alitsü atema 2nd March 1876 nung atu. Ibaji America Baptist missionary mezüngbuba Ao Naga tenemi talitsü asoshi atuba liasü. Sibsagar Baptist Arogo nung tamalen baptir aliba parnok 9, 19th August 1876 nung Molungkimongi belener atu. Dr. Clark 2nd March nungi 24th October 1876 tashi Molungkimong nung liasü. Iba küm Naga arogo züngsem ajema aküm kechiaser züngsem 3 süadok aser kar arogo nung atsüngdaksü, anungji tamanger züngsem 10 tang anünga liasü (*Sixty-third Annual Report 1877* in ABMC, p.66). Iba mapang pai sayutsüngiba mapa den külemi ken o meyipzükba mapa inyak.

Ao Naga Mission ulushia aotsü asoshi Dr. Clarki school ka lapoktsü atema Süngkong kimong, tenla ki yanglutsü atema Tsüben Reju kimong aser Missionary ki yanglutsü atema Mongsen Lenden asüngdang saka yimsüsürtemi memela. Iba den külemi Ao yimtsüng tulu kari Dr. Clarki sorkar itangiter ta bilema Molungkimong amaktsü amokmeren. Ibaji Dr. Clark aser tamangertem asoshi shisabulu aser timtem mapang ka liasü (L. Kijung Ao, *Nokinketter Mongchen*, p. 47).

Küm ishika tejakdang nungi Molungkimong nungeri par yim nungi khenpika pilar Molungkong ta ajaba tesemji aluyimtsü asoshi alitemo alidak aser talitsü tzü mopung tajung asütsü ta asadanga liasü. Iba den atongsema Ao Mission jaka tasen ka nungdaka aküm nung 24th October 1876 küm Dr. Clarki anir tamanger kibong 6 aser limapur kibong 9 Molungkimong toktsür iba tesem jagi ao (tang Molungyimsen) aser Khristan inyakyim maneni benshi. Dr. Clarki yamai zülü "Iba yimtsüng nung alir teimba Khristan lir, America nung Deobar anogo anisüngzükla amongba ama amonger, amongnü tekülem nung taoba küm dang nungi tang teimba arua atener aser Godhulai parnok oshi nung kü den tajungba sayutsüngir (*Sixty-Third Annual Report 1877* in ABMC, p. 39).

Godhula shiba Dr. Clark teyariteper liasü pai Dr. Clark dang küm tatem December 1876 sülenbo pa iba tenem nung malitsü ta shir aliba mapang kodang Ao Naga Mission Station belen pai tenem toktsür oadok (*Sixty-Third Annual Report 1877* in ABMC, p. 39). Ibaji Aortem asoshi dang masü saka Naga nung asoshi Mission station tasen mesemba liasü.

Molungyimsen nung mission station mesemteter kelen parnok meketa aliba yimtsüngtem tangi osangtajung bener ao. Ao lima yimtsüng tulutem den temba tinu ayimtsü asoshi Dr. Clark aser tamanger kar November 1876 nungi April 1878 tsüngda Chuchuyimlang, Mongsenyimti, Mopungchuket, Ungma, Longsa aser Longküm semdanga liasü.

Mrs Mary Mead Clark America nungi sodi aoba shilanger külen 1878 küm lai Molungyimsen nung mezüng school tetsürtem asoshi tenzük, meyilongi lenirtem training school asütsü atema teburtem a dena züngdaksü. Mezüng kaketsür karji Kilep, Samar, Tongpangla, Noksangla nungertem liasü aser tesülen parnokji arogo nung lenirtem, o meyipertem aser sayutsüngirtem aküm.

Dr. Clarki 1878 osang yamai agütsü, "1878 temogo, tasen baptiba 7, arogo asatanga temelenshi mali, arogo züngsem ajak agi 17. Tebur school nung tanur 30, tetsür school nung 12. Amongnü sayutsüngiba tekülem, sarasadem sentep aser Sunday School; hapta nung kenü sarasadem senden, aser Mrs. Clarki tetsür school nükongtsütsü agir" (*Sixty-Fifth Annual Report 1879* in ABMC, p. 41).

Dr. Clark sayutsüngir tang masü saka ken o zülü mongin tanishir asü nung pai kaketsü arogo meyipzükla liasü. Mezüng 1871 Sibsagar nung alidang Godhula aser Süpongmeren teyari ajanga Kibubai Sayuba Sarasadem aser ken kar meyipzük. 1883 nung Mathi kaketsü aser 1885 nung Yohan kaketsü aser Tenyartem Mapa kaketsü meyipzük. 1884 küm ken o zülü nung yaritsü asoshi printing press ka Ao Naga Mission Station Molungyimsen nung amenok. 1891 küm school nung tazüngtsü kaketsü "Ao Naga Primer No 1," 1893 küm "Ao Naga Primer 2" aser "Ao Grammar and Illustrative Phrases" Mrs. Mary Mead Clarki zülü.

(Maneni tapak 5 nung...)

METONGSHIR:

Tir Yimyim June 1, 2024 Adok Olemsabang nung "Molungyimsen-i Arogo otsü dak sendakba nung court-i aotsüsa akümba ratel" nung "December 18-19, ABAM Küm Tatem Mungdang..." ta alibaji "November 18-19, 2021" ta melenshia azüngtsü metongshitsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ao Naga Mission Otsü 1872-1897

(History of Ao Naga Mission 1872-1897)

(Tapak 4 nungi...)

1878 nungi tenzüka Ao Naga Mission nung missionary aser sayutsüngir tasen kar arusema Ao yimtsüng aser tanga Naga kintem tangi yok. 1878 küm Rev.C.D.King aser kibong aru aser Angami Naga nunger den inyaksü yok. 1879 Assamese sayutsüngir Zilli aser kinungtsü arusem aser July 1885 küm Lirmen nung school lapoktsü atema yok. 1885 küm Mr & Mrs Witter Lotha Naga tangi yok. 18th July, 1885 küm Rev & Mrs Rivenburg, Dr Clark den külemi inyaksü aru. Dr. Clark Americai sodi May 1885 nungi January 1887 tashi aoba mapang pai Ao Naga Mission Station repranga liasü.

January nungi February 1885 küm Dr. Clarki sorkar temeiner sepai anir Ao yimtsüngtem kar, Mopungchuket, Longjang, Chuchuyimlang, Ungma, Longsa, Longküm aser Mongsenyimti semdanga liasü. Iba mapang pai ongpanglen tzü mopung tajung chiteta kinungtsü tena ongpanglen linüa bilem (*Seventy First Annual Report 1885* in ABMC, p. 81). Ano Ao Naga Mission Station asoshia ibaji teyongtsü asütsü ta pai asatet.

Iba mapang nungi Dr. Clarki Ao Naga Mission ajanga Naga kin ajak osangtajungi tongtettsü asoshi tesem teyongtsü ka bushia asadang. Pai Nükenchiba, Yangchu (Yaongyimti) aser Kilep anir Mopungchuket, Longjang, Chuchuyimpang, Ungma aser Mongsenyimti semdang Mopungchuket aser Süngratsü tsüngda 'Tzütem' tesem nung Ao Naga Mission Station tasen asütsü shimtet (L.Kijung Ao, *Nokinketter Mongchen*, p.63).

Ao Naga Mission Yanglushiba (Reform)

1892 Rev & Mrs S.A.Perrine aser 1893 Rev & Mrs.F.P Haggard Molungyimsen tonga arua Ao Naga Mission nung missionary teimba aküm (*Seventy-ninth Annual Report 1893* in ABMC, p.101). Parnok aruba mapang 1892 tashi nung Ao Naga Mission nung lim arogo 5 aser baptiba züngsem 75 liasü (F.S.Downs, *The Mighty Works of God*, p. 115). Tamanger süaka limapurtem den meyokteba alir aser tesayur tajung peria maliba mapang asü nung tamangertemji Khristan tajung taküm ka ama meliteti yi jema, tejen sobaliba amshia, kaine (opium) chia aser limapur amongtsümong nungi mepilai liasü. Anungji Dr. Clark, Rev S.A Perrine aser Rev. Haggardi Ao Naga Mission aser arogotem yanglushitsü mera tasen ka agi (*Eighty First Annual Report 1895* in ABMC, p. 130).

Ao Naga Mission nung tamangertem tazüokba yanglushitsü asoshi ozüng tasen yanglu. Yanglushitsü asoshi 1894 lim arogo ajak khen anen (desolve/ ban). Parnoki Ao Naga Mission yanglushitsü asoshi iba ya mezüng Molungyimsen nungi tenzüksüla ta angatet anungji 19th August Dr. Clark kidang Rev. S.A. Perrine Chairman sür senden ka jazüka ozüng tasen metetdaksü. Tamangertem asoshi iba ya agizüktsü asü mesüra magizüktsü ratamata tia ka liasü. Bendanglembai iba ozüng tasenji kecha terata mekai agizük. Ita 1 shi lir Molung (Benny Assamese nunger) aser Kilepi ozüng tasenji agizük (Kilepbo ano baptist mesüi liasü). Iba sülen 23rd September, 1894 nung Bendanglemba, Molung, Zilli aser kinungtsü Jointa ajanga Ao Naga Mission tasen yanglushia tenzüksü, tesülen Kilepa densen. Yamaji tanga lim arogo 4 jia yanglushi (*Eighty-First Annual Report 1895* in ABMC, p. 130).

Impur Mission Station kümetba

Ao Naga Mission Station tasen asütsü atema Dr. Clark aser lenirtemi mekazüka akaba 'Tzütem' tesemi belentsü lemtet aser 10th March 1894 ali aliba sen ajak ali kibur den agütsütep. Iba jaka dang 'Impur' ta aja koba tetezü pioneer or citizen lir (L. Kijung Ao, *Nokinketter Mongchen*, p. 64). Mission station tasen nung ki o jen yanglutsü atema Rev. Haggardi kibong 1st October 1894 nung aser ita ka shi lir Rev & Mrs S.A. Perrine Impuri atu. Rev. Haggardi ki o jen Nepali süngranger, Aor süngtsük apur aser kisür anir tenzüka (Mary Mead Clark, *A Corner in India*, p. 137). Rev. S.A. Perrinei English Training School ka 1895 kaketshir 9 anir tenzüka (*Eightieth Annual Report 1894* in ABMC, p. 102).

Missionarytem Impuri tuaka Dr. Clarkbo Molungyimsen nung küm ishika liasü. Joko lim arogo aser tamangertem züina aküm nung missionary aser Khristantemi telungjem tentet ka akatsüla nungdak ta angateta 1896 Molungyimsen nung shisalemsateptsü adenshia Ao Baptist Arogo Mungdang (ABAM) tentetsü lemtet (Mrs. Clark aser Mrs. Perrinei züluba dairies nung ajemdaker *Minutes and Resolution of ABAM 1951* nung angutsü). Mezüng mungdang Ao Naga Baptist Arogo Mungdang (ANBAM) ta sür Molungyimsen nung 12th nungi 14th March 1897 tashi yimtsüng 17 nungi nütsüng 33 arua among (L. Kijung Ao, *Nokinketter Mongchen*, p.74). 1961 tashi iba nungja amshia arur 1962 nungi Ao Baptist Arogo Mungdang (ABAM) ta melen. Iba ANBAM mungdang sülenang Dr. Clark aser kinungtsü, küm 20 tashi Molungyimsen nung lia arur 24th April 1897 nung Impuri tua Naga Mission mapa tuluba maneni inyaka ao (Mary Mead Clark, *A Corner in India*, p.146).

Otem:- Ao Naga Mission otsü aser lim arogo otsüji sentaktepa lir saka ano balala ta angateter. Missionary, evangelist, tesayur, sannüker etc tem Ao Naga tenemi aruba aser parnok tenyaba mapaji lim arogo ka kisung asoshi masü saka Ao Naga Mission asoshi ta angatetti. Iba tangatetba nung ABAM aser lim arogotem, lim arogo aser lim arogo noktakrapangla aser inyakrapangla ajak tsüngda nung liromedema, tangatetep aser tesendaktep tajung nung aotsü südi ta imlaa kü tangatetba lemsateper. Iba nung maneni bushiloka, melenshia aser metenloka arogo otsü bushirtemi (Church historians) zülutsü ajongshir. SHALOM

Züngsem million 1 aliba Conference-i United Methodist Arogo toktsür



April 23, 2024 nü Charlotte, North Carolina nung United Methodist General Conference nung tekülem sentong tenzükdang tangokba noksa nung angur.

June 02, 2024: United Methodist Church nung züngsem million 1 shi aliba regional conference kati United Methodist Arogo toktsütsü atema vote agütsütepa telemteba agiogo.

United Methodist Arogoi kasa tetsür o tetsür na mesüra tebur o tebur na kiyimba agizükba atema West Africa nung amenoka aliba Côte d'Ivoire Conference-i UMC toktsütsü atema vote agüja telemteba agi.

UMC-i parnok indang Book of Discipline nungi kasa kiyimertem moatsüba aser kasa kiyimertem ordain sütsüba tenokdangba agiena liasü.

Côte d'Ivoire Conference ya alima nung UMC nung züngsem teimtiba aliba regional bodies rongnung ka liasü.

Osangbener den jembidang Institute on Religion & Democracy nung Tir, Mark Tooley-i, "Ivory Coast Methodist -i USA Arogo den tesendaktep ayuba dang nungibo Orthodox tangatetba ang shimba atema pelar," ta metetdaksü.

Tooley-i, "2004 küm jakedangbo iba conference ya independent liasü, anungji tawa tenzüka conservative denomination, Global Methodist Church nung adenba dang nungibo parnoki tamalen ama independent ang asütsü shimtsüa akok," ta metetdaksü.

"Africa nunger teimbakati USA tangatetba tasen nung manidaksüa akok, anungji maneni Africa nung amenoka aliba conference aikati UMC toktsütsüa akok," ta paisa metetdaksü.

Kasa kiyimertem moatsüba, kasa shi nung aziüapongertem Arogo nung ordain sütsüba aser LGBT advocacy teloktem senotsü agi yariba onüktem nung mapang talangka o toktepa arudang tesüba küm ishika tsüngda conservative congregation 7,500-i UMC toktsüogo.

Taküm küm tetenzüklen UMC General Conference nung adenertemi Book of Discipline nung tenokdangba kar agiena kasa kiyimertem agizüktsü atema vote agüja temeltetba agia liasü.

Nigeria nung telok kati puer aoba putir Oliver Buba chiokogo



June 02, 2024: Taoba hopta Nigeria nung telok kati putir ka puer oa liasü, ajisüaka pa puer aoertemi pa chiokogo, ta Arogoi metetdaksü.

May 21 nü Numan Local Government Area nung aliba St Rita Catholic Church nung putir, Oliver Buba puer oa liasü, ajisüaka pa puer aoertemi pa chiokogo, ta Yola Diocese nung tongti putir, Stephen Dami Mamza-i metetdaksü.

Nigeria nung nütsüng million 230 lir aser nütsüng teimbaka Khristan aser Muslim

nungertem lir. Civil Society Joint Action Group-i ashiba agi, 2019 küm nungi tenzüka tang tashi nung Nigeria nung nisung 17,469 puer ao aser parnok teimbaka Khristantem lir.

Aid to the Church in Need, Ireland nung Public Affairs Director, Michael Kelly-i, Buba chiokba atema Yola Diocese nung putirtem aser züngsemtem den külemi ACN-ia Tsüngrem nem tenüngsang agütsür, ta metetdaksü.

Michael-isa, "Putir Buba chiokba atema Tsüngrem nem tenüngsang agütsüba den külemi tesüba mapangtem nung puer aoba putir asem atema onoki teblemstü katsür. 2019 küm putir John Bako Shekwolo sama aser 2022 küm putir Joseph Igweagu aser putir Christopher Ogide na puer aoba sülen tang tashi osang kecha mali," ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Sürürütsü
(adj) teku nung ola adoka nungbanga atuba (chest congestion)
* Tantsür tambur akümdang aika dak sürürütsü atur.
Sürra
(n) ki kilem nung atongba tupak tulu (palm leaf)
* Akhidangbo Aor yim ajak nung sürra ki dang liasü.

OLONG PAITEP # 6806

	1		2			3		4		5
6								7		
					8		9			
			10							
11										
				12						
13	14		15							16
17										18

TIPLIN		LANGTSÜNGLEN	
1. Inyaker ajangtetba	-(3)	1. Meshidak	-(3)
3. Bangsemo adokdak	-(5)	2. Tanaben soshir	-(7)
6. Shitak mesüi inyak	-(7)	3. Iba anogo	-(4)
7. Ya mimong nung angur	-(3)	4. Meshi	-(3)
9. Reprangzük	-(4)	5. Yagi mi tsükloker	-(9)
10. Tasola	-(5)	6. Shi tapu ka	-(9)
11. S _ _ _ _	-(4)	8. Yagi ayimer saka ozü masü	-(3)
13. Yagi ajak ashioktsür	-(3)	9. Ajokba shiruru ka	-(7)
15. Ki aokba oset	-(7)	12. Inyaktet	-(4)
17. Ak shi nung inokba tasen	-(5)	14. _ _ _ hi	-(3)
18. Ishika	-(3)	16. Akümüli nungi pilar	-(3)

OLONG PAITEP # 6805 TELANGZÜBA

TIPLIN :		LANGTSÜNGLEN :	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kiooktsü,	
9. Kin, 10. Teti, 12. Süir, 13. Jen,		5. Lentü, 7. Tajangzük, 11. teronem,	
14. Ola, 16. Talak, 17. Mazük.		12. Sempa, 13. Jahaz.	

NAI-A YA METETTER MA



Riyadh nung amenoka aliba football club Al Hilal-i tawa tu parnok stad ium Kingdom Arena nung record-breaking season benjung mongogo. Parnoki 2023-24 Saud i Pro League takok marok anguba dang masü saka Guinness World Records certificate ka ngutetogo. Al Hilal-i yaküm September nungi taküm April tashi nung games 34 khen dang methitemi takok nguteta aruba atema Guinness World Records ka agütsü. Al Hilal head coach Jorge Jesus aser club president Fahad Bin Saad Bin Nafel na nem Guinness World Records Official Adjudicator Kanzy Defrawy-i kulikaket agüja liasü. Al Hilal-i yaküm Brazilian superstar Neymar €90 million agi alizüka liasü.

Assam Rifles-i cyclone ajanga timtemer nem medical camps katsü

Imphal, June 2, 2024 (Agencies): Indian security forces-i Manipur-Myanmar arrtsülen alirtem angati medical treatments agütsüo.

June 1 tashi anogo asem sepaitemi arrtsülen alirtem talisa tetsürtem aser tanurtem yariogo ta defence wing sangdong ka nung ashi.

Chandel district kübok Gelnai, Kanan aser Paldai yimtsüngtem asoshi June 1 nü medical camps ayonga agi. Cyclone Remal ajanga timtem ajururtem nem iba teyari agüja liasü.

Sehlon, New Samtal, Kovang aser Tuitong yimtsüngtem nung Assam Rifles-i health check-ups aser medical teyari agütsü.

Tengnoupal district kübok B. Bongjang yimtsüng nunga mapang talangka basic medical facilities mengui timtema aru. Iba yimtsüng den tesentaktep majungba den tzüngluruwa asüba agi yimdaklirtem asoshi tensa tamajungba kümogo ta Assam Rifles-i ashi.

May 31 nü Assam Rifles-i Diocesan Social Service Society (DSSS), Mantripukhri den yaritepa B. Bongjang nung medical camp ka ayonga agi.

Iba medical camp nung B. Bongjang aser anameta aliba yimdaklir 210 nem nüngdakba healthcare services agütsü.

May 30, 2024 nü Churachandpur District kübok Walkhu yimtsüng nunga medical camp ka ayonga agi. Iba camp ajanga yimdaklir 186 ajangzüka liasü.

TENÜNGSANG AGÜTSÜR

Ungma Yimlang Pongen kidong nungi Oboula Imertetba semchir Wabong Likokkümsang Pongener aser kinungtsü Supongchula Jamitsür kanga dang ajemalu aser meranga inyaker kibong nungi dena jala **Kongro Asapokla Pongentsür-i**, Asst. Professor in Ao under Higher Education NBSE CESE 2023 tetoktepba nung takok tulu ngua temaba shisaliok riju nung lanuasensortem sayutsü menden ajangzükteba atema Oboula Imertetba semchir kidong aser Illangtsür-i ne dang kanga pelar aser takoksang Tsüngrem nem sentsüwangshi agütsür.

Iba metsürkabuba putu nung na shisaliok riju nung tesayur ka ama tesangwa milen tuluba tsükloksür lanuasensortem alima yangluba nung shilem tajung agir yimjung yanglur anitetang ni ta tamang tulu kaa tepela lemsateper.

Tsüngrem dang sentsüwangshi.
Sd/- **Imkongnungla Pongentsür Ungma.** Sd/- **Ekumsangla Pongentsür, Ungma.**

Assam kübok Cachar nung Rs 9.5 crore jenjang heroin apu



Guwahati, June 2, 2024 (Agencies): Assam kübok Cachar nung police-i heroin shibelener nisung 6 puogo. Parnok ya tesem balala ana nung apu.

Osang kar angazükba sülen police-i Ram Prasadpur, Dholai aser Banskandi areas mita aodang nisung 6 apu.

Parnok ket nung heroin seret 1.9 shi bena liasü aser ibaji sapon pongdang 150 nung enoka liasü.

Parnok trok ya Bintu Singha (28), Rajen Singha (41), Ekbar Hussain (23), Borjohna Hmar (27), Robert Lalmalsawn (24) aser Daniel Lalringhet (26) nunger ta jangaog.

Parnok ya Assam kübok Cachar, Manipur aser Mizoram nung alirtem lir. Police-isa parnok ket nungi scooter ka aser SUV ka puogo. Parnoki bena aliba heroin indang jenjangji Rs 9.5 crore shi alang asütsü ta asadangtetogo.

Mizoram Minister-i PM Modi dang nungi Rs 1,000 crore teyari meshir



Aizawl, June 2, 2024 (Agencies): Mizoram Minister Dr K Beichhua-i Prime Minister Narendra Modi dangi shidi ka nung tzünglu aser anentsh ajanga teraksa bentsür aruba metetdaksüo.

Cyclone Remal ajanga Aizawl District nung anentsüh lendong balala nung nisung 34 taküm samaogo ta Minister Beichhua-i shidi nung shia lir.

Lendong balala nung nisung samar bushitepdar aser tzünglu maneni aruba ajanga lenmang, apu, water supply, power supply, ki aser alu aika raksaogo ta

paisa ashi. Dr. Beichhua-i Centre sorkar dang nungi Rs 1000 crore special assistance meshiogo.

Iba ama mapang tamajung ka nung Mizoram nunger yaritsü nüngdaker ta pai PM Modi dang ashi.

Assam, Manipur, Meghalaya, Mizoram, Tripura aser West Bengal nung Cyclone Remal ajanga lendong balala atalokba nung tasürtem aser yirurtem nem Prime Minister's National Relief Fund (PMNRF) nungi teyari agütsütsü ta Prime

"Assam, Manipur, Meghalaya, Mizoram, Tripura aser West Bengal nung Cyclone Remal ajanga tasür kibong shia nem PMNRF nungi Rs 2 lakh agütsütsü. Yirua alir shia nem Rs. 50,000 agütsütsü" ta PM Modi-i ashi.

Mizoram Chief Minister Lalduhoma-ia May 28 nü Cyclone Remal ajanga anentsüh lendong atalokba nung takoksa angurtem yaritsü atema Rs 15 crore agütsütsü metetdaksüo.

CM Lalduhoma-isa lendong nung tasür kibong shia nem Rs 4 lakh agütsütsü shiogo.

Ceasefire mechi Israel minister anati sorkar loksatsü amokmeren

Tel Aviv, Aami/June 02 (Agencies): Hokulbarnü US Tir Joe Biden-i sayaba Gaza ceasefire proposal nung Ato Kilonser Benjamin Netanyahu-i mulungra mapa nungi anena coalition sorkar chirepdaktsüsü, ta Israel nunger far-right telok nungi minister anati ashi.

Finance Minister Bezalel Smotrich aser National Security Minister Itamar Ben-Gvir nati Hamas mesamatsüdang tezüngzüktep yanglutsü khenyongi memulunger ta ashi.

Netanyahu-i iba sentong nung bhukuma nokdakra sorkar yaritsü ta opposition lenir Yair Lapid-i ashi.

Ato kilonseria Hamas indang mitkar aser yimsü asütsü tashi mesamatsü tashi aser pua alir ajunga mechiok tashi teti atema rara manentsü ta shijen shia arur.

Ajisüaka mapang tatsüka lir Netanyahu indang adviser kati iba sentong ya onoki mulunga agizüker aliba ka lir aser ibai tajung mesüaka Israel-i agizüksü ta ashi.

Biden-i benokba shilem asem aliba proposal ya hopta trok ceasefire nungi tenzüksü aser iba mapang Israel Defense Forces (IDF) ya Gaza nung nisung aika aliba tesem nungi ainshitsü. Iba tezüngzüktep kübok tatem nung pua alir ajak chioktsü, teti atema tsükchitepba anentsü aser Gaza tanaben yanglushitsü atema sentong tulu tenzüksü.

Ajisüaka Smotrich-i Honibarnü social media post ka nung, "Hamas mesamatsü aser pua alir ajak mechioki rara atemtsü asoshi sentong benokba mulunga agizükba sorkar nung nibo madentsü ta Netanyahu dang shiogo," ta ashi.

Ben-Gvir-ia "Iba tezüngzüktep yagi rara tatem kati arudaktsüsü aser Hamas samatsüsü nükjidong yutsüsü. Ibai shisadanga maliba deal ka lir, koba ajanga kiralongrar nem takok ngudaktsüsü aser Israel linük asoshi security tsütsü timtem alitsü," ta ashi.

Pai US-i benokba sentong mulunga agizüksü melen sorkar ang anentsüsü ta nangzük.

Netanyahu'er right-wing coalition ya parliament nung tera agi timba lir, aser Ben-Gvir'er Otzma Yehudit (Jewish Power) party densema telok aika dak metaloka lir. Parliament nung Otzma Yehudit party nungi züngsem trok lir aser Smotrich'er Religious Zionism party nungi züngsem tenet lir.

Ajisüaka Israel nung opposition yimsüsür tejangjatiba rongnung ka ta züngshiba Yari Lapid-ibo ati kilonser yaritsü asgi. Par Yesh Aitd (There is a future) party ya parliament nung menden 24 nguteta lir.

"Ben-Gvir aser Smotrich nati sorkar yutsüra ato kilonser-i pua alirtem chioktsü asoshi jembishinütsü atema onok lir," ta pai ashi.

Netanyahu indang sorkar nung külem tenzüker temi ola madokdang senior foreign policy adviser kati, iba sentong nung tejangja shisadanga angatetteptsü aika lir aser ozü nükjidong matong tashi teti atema ceasefire malitsü, ta ashi.

Ajisüaka Ophir Falk-i Sunday Times osangkaket den sensaksemba mapang, Biden indang sentong ya asenoki taoba mapang mulunga agizükteper aliba lir, aser ibai tajung mesüaka onoki pua ali ajunga chiokdaktsüner, ta ashi.

Tel Aviv nung nisung

meyirijang aika adenshia Israel sorkar dang Biden-i benokba sentong ya agizükang ta takhangba agütsüba mapang iba mangatettep ya adoker.

Longkak aiter aikati Netanyahu ato kilonser menden nungi alutsü akhanger aser pai iba sentong ya raksatsü ta kar osangbener dang ashi.

Longkak aiter aser police tsüngta raratepa liasü aser police temi water canon amshia parnok senshidaktsü aser kar apu.

Ita ishika Tel Aviv nung anogoshi amai longkak aita arur, kong pua bener oa aliba kinunger aser danga sorkar anemer temi rallies ayongzuka pua alirtem chioktsü asoshi mera agitsü akhanger aser Netanyahu ato kilonser menden nungi alitsü mesüra election agitsü akhanger.

Honibarnü sangdong ka nung Egypt, Qatar aser US nungi tetsüngtai ia yimjung ken o jembitsür temi Israel aser Hamas dang Biden-i benoktsüba deal nung tatem telemtetba agitsü ajungshia liasü.

UK Ato Kilonser Rishi Sunak-ia iba sentong bhukumtsü ta ashi aser Hamas-i iba ceasefire sentong agizük nungbo zorkari Gaza nem teyari tali agütsüsü, ta osangbener dang shia liasü.

Biden-i iba sentong sayar sülen Netanyahu indang office ajanga sangdong ka agütsüba nung rara atemtsü atema Israel teinyaktsü memelenshi lir ta ashi.

Gaza nung iba rara tenzüker tang tashinung Palestine nunger 36,000 dak tema tepsetogo, ta Hamas meyong health ministry ajanga ashir.

North Korea-i ano jana bener balloon 600 South-i yokogo

Seoul, Aami/June 2 (Agencies): North Korea-i jana bener balloon 600 arrtsü adena yokogo, ta South indang military-i Deobarnü metedaktsü. Deobarnü hazmat suits semer personnel temi jana bendenba nguogo, kong moko pongsang, cardboard aser plastic tem densema liasü.

South Korea-iba inyakyim ya jenjang makaba inyakyim ka ta shiogo, ajisüaka tawa ballistic missile tendangba amabo iba inyakyim atemabo UN-i kecha tenokdangba agüja mali.

North-i balloon yokba manenra jenjang tapet agitsü ta Seoul-i tekümdangtsü metedaktsüogo aser ashiba agi, iba inyakyim ya 1950-53 Korean War tembangdaksüba armistice agreement anema lir.

South Korea indang Joint Chiefs of Staff-i nüburtem

dang item janatem nungi pila alitsü metedaktsüogo, ajisüaka tang tashi nung lendong aketba osettembo kecha nguteta mali.

Mongolbarnü nungi tenzüker Pyongyang-i balloon 900 shi yokogo, ta JCS-i ashiba den balloon tesüsabuba yokba ya Honibarnü nikongtsüsü nungi tonga aru tenzük, ta shisem.

Deobarnü 10 ako shi tashi nung balloon 600 shi tonga arur aliba jangjaogo aser ghonda shia balloon 20 nungi 50 shi anüng ajanga arua liasü.

Balloon tem ta linük yimtiba Seoul aser iba yimti den atonga aliba Gyeonggi tesem densema northern province tem nung tsüka arudar, kong Korea nunger nütsünyongsük tesadang shi lidar.

Deobarnü tonga aruba balloon tem nung moko

pongsang, tamagitsü paper, süjen aser plastic tem densema lir, ta JCS-i ashi.

Balloon yokba atema telangzüba agüja North Korea den arrtsü nung loudspeaker propaganda campaigns tenzükshitsü asoshi asadangtsü atema South Korea indang National Security Council senden amentsü imlar, ta Yonhap sangdong ka ajanga metedaktsü.

Taoba mapang South Korea-i, Kim anema propaganda tem North-i yoka liasü aser iba ajanga Pyongyang kanga mepeladaktsü.

South Korea nunger activist temia arrtsü adena parnok indang balloon tem yokogo. Parnoki leaflets aser khen khenbo sen, jang mesüra K-dramas inoker USB thumb drives tem yoka arudar.

Menungra Bilemteter



Asür Imtingangshi Lkr.
3rd June, 2019

Pungmang ka ama bilemer saka asangsang nung nai onok toktsür or küm pungo abensa aruaka ne libaliro aser sayubentsü tajung onoki kodanga mamar aser Tsüngrem nem tenüngsang agütsür.

- Temeim Kinungtsü, Jabaso aser Kinungertem.

WATER BORING SOLUTION (DIMAPUR AREA)

We do complete Borewell job using A to Z branded materials.

(Around 300 Feet depth) with a reasonable budget of just Rs. 2,00,000 (Two Lakhs only).

IF INTERESTED, KINDLY CONTACT US :

7005342378 or 9436644497

Ukraine peace summit nung menden-daktsüsü China-i meranga inyakdar

Kyiv, Aami/June 2

(Agencies): China aser parnok indang diplomat tem amshia Russia-i June ita tom nung agitsü aliba peace summit minprongtsü atema takok tashi inyakdar, ta Zelensky-i, Singapore nung Shangri-La Dialogue agiba mapang osangbenertem den sensaksem dang ashi.

Iba senden nung Ukraine tir-i o jembi aser Asia nung linük balala lenirtem dang Russia-i tenzükba rara tembangtsü atema lenmang ka bushitsü asoshi iba summit nung shilem agitsü mepeshia metedaktsüogo.

"Ukraine nung kechi atalokdar aji onoki Asia nem metedaktsüner. Onoki Asia linüktem teyari nüngdaker," ta Zelensky-i Deobarnü ashi.

Zelensky-i pa tebilemba lemsatepba dak sendakba nung China-i kecha telangzüba agüja mali.

Anünglen nungi Ukraine amaktsü atema Russia-i arrtsü nung jenjang tali agiba mapang Ukraine nunger lenir yagi taoba hopta nungi tenzük linük balala tali semdangdar. Pai, Global South ta ajaba linüktem densema linük balala nungi lenirtem June 15 aser 16 nü agitsü aliba summit nung dendaktsüsü atema inyakdar.

Linük 100 dak tema aser state telokatem 75-i iba summit nung shilem agitsü jangjatsüogo, ta Zelensky-i ashi. Iba summit ya Switzerland nung ayongzuka agitsü.

G-7 lenirtem aikati iba summit nung shilem agitsü sentong lir, ajisüaka tir Joe

Biden bo iba senden nung shilem magitsü, ta Bloomberg News sangdong ka ajanga metedaktsü. China-ia iba senden nung shilem agitsü tebilemba maliba temaitsü sayuogo.

US-i linük kar dang iba senden nung shilem agitsü ajungshio aser kasa mapang nung China-i iba senden anema inyakdar, ta Zelensky-i ashi.

China aser Brazil nati rara tembangdaksüsü atema Russia aser Ukraine napronglai agizükba international senden ka ayongzüksü ayongzükogo.

Zelensky-i ashiba agi, Asia nunger lenirtem shirnoki iba summit nung shilem agidir parnok ya alima ajunga kümzüka toktsüba nung shilem ka akümtsü aser rara anema longjemtsü asoshi teyari agütsüsü. Iba senden nung nuclear weapons, food security aser rara mapang tepuokertem chiokdaktsüsü atema onük balala benoka sensak asemtsü.

Russia-i küm asemubua Ukraine amakba mapang tang Zelensky-i Asia semdangdar. Ukraine rongsenketzung atem jangotsü aser oilseeds tem alima nung shishilembadak tonga aotsü nüngdaker aser Zelenskiy-i, Black Sea nung rongtem tekümzüka kübok sadem sadema senzüdaktsüner.

Ukraine tir-isa, China aser Russia na tesedaktep ashishio aser ashiba agi, Beijing-i Moscow nem teyari agütsüba ajanga Ukraine nung rara tali atsülanga aotsü, ta ashi.

Nagaland Olympic Association Olympic Day nung shilem agitsü

Dimapur, Aami/June 2 (TYO): Alima ajunga nung June 22 nü Olympic Day amungba anogo Nagaland Olympic Association (NOA)-a Indira Gandhi Stadium, Kohima nung iba anogomung amungtsü atema sentong yanglua lir. Iba sentong ya "Let's Move & Celebrate" omen nung ajemdaker amungtsü.

Taküm sentong ya tanur arishi küm 6 nungi 12 tsüingda alirtem ajungmesotsü atema yangluogo. Sentong nükjidongji asaya balala nung shilem agia arakzua aliba libaliro aser sportsmanship ajungketsü aser Olympic tanüla benjungtsü atema lir.

Asayatem vamai alitsü:

- 50 Meters: 6years- Under 8 years (23/06/2016 - 22/06/2018 tsüingda asortem)
- 80 Meters: 8years -Under 10 years (23/06/2014 - 22/06/2016 tsüingda asortem)
- 100 Meters: 1 0 y e a r s - Under 12 years (23/06/2012- 22/06/2014 tsüingda asortem)

Iba dak sendakba nung NOA-i, tsürapur, guardian, school aser asaya meimertem dang pei tanurtem iba asayamung nung shilem agitsü ajungshitsü mepeshia metetdaksüogo. Olympic Day Run nung shilem agiba ajanga tanurtem physical fitness atema shilem agiba dang masü saka iba ajanga tembar yimteptsü aser asaya ajanga tali telongjem adokdaksütsü.

Maneni tetoktepba balala nung takok angurtem nem ajak senteper sen lakh ka senpet agütsütsü aser iba den Nagaland Olympic Association (NOA)-i kuli kakat tajung agütsütsü, ta kasa sangdong ajanga metetdaksü. Asaya nung shilem agirtem ajak nem International Olympic Committee (IOC)-i kuli kakat agütsütsü.

Olympic Day Run 2024 atema züngoksemtsü asoshi tanur arishi küm 6 nungi 12 tsüingda alirtem atema mapang lapoktsüogo. Pei tenüing

züngoksemtsü atema tatembangbuba anogoji June 17 nü asütsü.

Tenüing züngoksemtsü atema tejangrartemi atakzükja aliba mapang metembang tsüingda NOA office, Kohima-ia züngoksemtettsü, mesüra <https://forms.gle/n2Nv3D5LuGPsVBk56> ajanga apply sütettsü mesüra QR code scane sütettsü.



Maneni osang tejangjaba agitsü atema teküboklen agüja aliba ketdangsürtem ajanga Nagaland Olympic Association, Kohima office den tongteprateptsü.

- Ms. Kajiloni Krichena - +91-7085-333-972
- Ms. Khuvinu Tase - +91-9362-355-375.

Boxer Amit Panghal Paris Olympics atema qualify süogo



Aami/June 2, 2024 (Agencies): Deobarnü Bangkok nung 2buba World Qualification Tournament nung World Championships silver medalist Amit Panghal-i 51kg quarterfinals nung China nung asayar Chuang Liu koka Paris Olympic atema qualify süogo.

India nung tebur asayartem rongnungi Panghal-i dang world championship nung silver medal ka ngua lir aser Deobarnü pai kanga meranga asayar Liu 5-0 agi kokogo aser Olympics nung tanabenbuba asayatsü atema qualify sütetogo.

Tang tashi nung India nung asayartem rongnungi

Nishant Dev (71kg), Nikhat Zareen (50kg), Preeti Pawar (54kg) aser Lovlina Borgohain (75kg) nung Olympics atema qualify süogo aser tang parnok den Panghal denogo.

Taoba qualifying events ana atema selection agiba mapang pai world championship bronze medalist Deepak Bhorla makokba ajanga pa tokteptsü atema maongka mangu aser pa atema Olympics asoshi qualify asütsü atema maongka ka dang liasü, koba pai agitetogo.

Asayamung tatembangbuba anogo India nung asayartem rongnungi Jaismine Lamboria (57kg) aser Sachin Siwach (57kg) natia Olympics atema qualify asütsü merangtsü.

Taoba Real Madrid manager Mourinho Fenerbahce-i aotsü



Aami/June 2, 2024 (Agencies): Jose Mourinho, shibai Porto aser Inter Milan nung coach mapa inyakba mapang Champions League anaben koker lir, pai Honibarnü sangdong ka ajanga pai Turkish football club Fenerbahce indang coach mapa agizütsü ta shiogo.

Mourinho, shiba January ita Roma-i mapa nungi anentsüba sülen mapa makai liasü, pai Chelsea, Manchester United, Tottenham, aser Real Madrid nunga kanga takok ngua

inyakogo.

Fenerbahce indang X account nung Mourinho-i, "Fenerbahce indang fan tem den nikongtsütsü tajung salem lemsateper, nenok den asüing Kadikoy (Istanbul suburb kong club amendaka lir) nung ajurutepti aser asenok journey tenzükti," ta ashi.

Arishi küm 61 tain coach yagi Wembley nung Champions League final mapang TNT Sports television atema pundit ama inyakba mapang iba osang

sangdonga liasü.

Turkey indang NTV television sangdong ka ajanga ashiba agi, Mourinho shimba osang ya Deobarnü officially sangdongtsü imlar.

Pai Fenerbahce den küm ana atema tenangzüktepba yanglutsü imlar. Fenerbahce ya Istanbul club tongtibang asem rongnung ka lir, saka parnoki taoba küm ter tsüingda domestic league ka danga koka mali.

Mourinho tesüsa Roma nung coach mapa inyakogo. Pa iba club nung küm ana ser tesadang inyaka liasü, ajisüaka club-i junga masayateti jenjang tekububai aluba sülen taküm January ita pa mapa nungi anenja liasü.

Roma nung inyakba mapang Mourinho lenisüba nung parnoki 2022 küm mezüingbuba Europa Conference League akok aser taoba season Europa League final tonga ania liasü.

French Open: Swiatek, Marketa & Gauff nung quarter-i iogo

Aami/June 2, 2024 (Agencies): French Open tetsür kija asaya nung Deobarnü defending champion Iga Swiatek-i 6-0, 6-0 agi Russia tsür Anastasia Potapova minute 40 nung ayong ayonga kokogo.

World number one Swiatek shiba Roland Garros pezübenbuba akoktsü atema meranga asayadar la quafter final nung Marketa Vondrousova den asayatsü.

Tetsür kija asaya tanga ka nung Marketa Vondrousova-i Serbia tsür qualifier Olga Danilovic 6-4, 6-2 agi akokba sülen la quarter nung Swiatek den asayatsü jangjaogo.

Fifth seed Vondrousova, shiba 2019 küm Roland Garros nung runner-up liasü, lai Danilovic den asayaba mapang tatembangbuba game 13 nungi 11 koka asaya kokogo.

Czech tsürla ya taoba mapang world number one Swiatek den asemen asayar lir aser asemen prongla nung la tamakok ngua liasü.

2020 küm Roland Garros nung Vondrousova den mezüingbuba round nung asayaba mapang Swiatek-i game asem dang makok aser asayayonga tur mezüingbuba French Open koka liasü.

Maneni tetsür kija asaya nung America tsür Coco

Gauff-ia 6-1, 6-2 agi Italy tsür Elisabetta Cocciaretto koka quarter final tongtetogo.

US Open champion Gauff quarter final nung Ons Jabeur mesüra Denmark tsür Clara Tauson den asayatsü.

Kasa asayamung tebur kija asaya nung Novak Djokovic-i kanga meranga asayarang Italy nung asayar Lorenzo Musetti 7-5, 6-7 (6/8), 2-6, 6-3, 6-0 agi kokogo.

Iba asaya akokba sülen Roger Federer-i Grand Slam nung asaya 369 koka otsü tasen ka yanglur aliba Djokovic-i menepa kasasa kümogo aser pai taruba asaya kokra otsü tasen ka yanglutsü.

Paris Olympics atema Nishant Dev ticket nguogo



Bangkok, Aami/June 2, 2024 (Agencies): Hokulbarnü Nishant Dev (71kg)-i Boxing Olympic qualifiers indang semi-final tongtetba yong India nung tebur boxing asayar mezüingbuba Paris Games quota angur kumogo.

World championships nung bronze medal angusang Nishant Dev ya taoba qualifiers nung tera agi Olympic berth mongutet, saka quarterfinal nung Moldova nung Vasile Cebotari madak 5-0 agi takok ngua Paris Olympics quota ajangtet.

India tsür Nikhat Zareen (50kg), Preet Pawar (54kg) aser Lovlina Borgohain (75kg) nung Paris nung iba asayamung nung shilem agitsü

jenjang ajangteta lir aser Nishant ya India nung pezübenbuba alitsü.

71kg weight class nungya quotas pongu lir.

Dev ya iba asayamung nung kanga junga asaya arur aser Cebotari den tsüingtepba mapang pai amajok nung teka mesangshi saka mezüingmezüing ishíben kanga junga atsüing.

Round tanabuba nung Cebotari-i Dev dak ishíben tsüingshi aser pa tera ajema akumer ama liasü, saka pai maneni mezüingmezüing atsüing.

Tatembang minute asem nung tenaprong kanga sashia tsüingtep saka Dev-i tajungba tsüingshia liasü.

India tsür Anushita Boro-ia 60kg category quarterfinals nung Sweden tsür Agnes Alexiusson den kanga meranga tsüingtep, saka 2-3 agi tamakok ajurua liasü.

Kasa anogo nikongdang India nung Arundhati Choudhary (66kg) aser Amit Panghal (51kg) tsüingteptsü lir.

BILEMDANGANG

"Mapa inyaktsü atema taküm alitsü masü, taküm alitsü atema mapa inyaktsüla."